

PAAVORO ITIONCAJINIRI

TIMOTEO

Antsatantaquemparoca

Ocatica iroguenti antsatantaquemparoca paperi mavitetapojatsica itioncacaantaqueca Paavoro itioncaquenerigueti Timoteo. Irocashi itioncacotaqueri irira Paavoro otsipauqui paperiqui (Ya. 7.57–8.1; 9.1-31; 13.1–28.31), aisa itioncacotaqueri Timoteo paperiqui Yantajiguica 16.1-3; 17.13-16; 18.5; 19.22; 20.4. Ocatica paperi iroguenti teroncapojatsica itioncacaantaqueca Paavoro, choocaquea otsipa 12 paperipae itioncacaantaqueca choocajianquitsica paperiqui icantajitica *Tsvetacoquerica Jesoquirishito*. Itioncacaantaquero ocatica paperi ajagantsiniqui 64, ichoocaquegueti Iromaqui, pajinigueti irimetojaque. Itioncacaanquerogueti iriguenti itsipataja Irocashi, tee irovashianteriji (4.11).

Itioncacaantaquero ocatica paperi itsaquetari iroshipoji imetojajitaqueri, inintaque intampishishirentacaqueri Timoteo aisa icantaqueri quero incoquempani inchoocaquegueti cameetsa (1.3-14; 2.1-13; 3.14–4.2, 5). Aisa itsatacaqueri aatoja iquemisantiritsi tsatacaantajiguiroca teeca iroomajateji (1.15-18; 2.14–3.9; 4.3-4). Icamantacotaca quero incojitaquerini (3.10-13; 4.6-8, 14-18). Aisa icanqueri Timoteo iramajeri Maricoshi aisa yashintaguetacaca Paavoro yoanaqueca ontaniqui (4.9-13, 21).

1 ¹Naroguenti Paavoro itigaran-cane Jesoquirishito, iriguenti-quea nintacaaquenaro Aapani Irioshi nontsavetantaqueroquea icantacaacajica icanquegueti iranijacaajaji Quirishito Jesoshi. ²Imaica nontioncaquempi, irijani Timoteo nopintsamajatacaca. Namanacoventaquempi incavintsajamajiaquem-pinijite Aapani Irioshi aisa Amajirote Jesoquirishito, impintatacotaquempinijite, inchoocatacaajiaquempinijite cameetsa aatonijite taaca opaji pishoshoguiteventajigatsi.

Aatojate itsaroguitsi intsavetantaqueringueti Jesoquirishito

³Nocoguitani tsiteniriqui aisa savinca-guiteriqui namanaquerigueti Aapani Irioshi noquenquejapinitaquempi, nocanqueri: “Arioteesa.” Iriguentiquea notsaromentacaca, noquempetacari choviquijianaquenaca, teequea onchoocateji nantaqueca chagashirentaquenacaca. ⁴Noquenquejajiro pijaquija, nonintantacaca namenajatempiquea imaica cameetsanijite noshinevaequempanijite. ⁵Aisa noquenquejacoquempi pitsaromentamajatacariquea Aapani

Irioshi piquempemajajiacaroquea pishaote Iroira aisa piniro Eonise. Notsamajaquequea arimajaca piquempejiacaroquea iroatimpajia pitsarovenamajajiacariquea.

⁶Irootaquequea nonintantacaca nonquenquejacaajempiroja coramani nopamiquempigueti pishinquiregui-shiqui yagavejacaanquempica Aapani Irioshi pintsavetantavaeque. Imaica noncanquempiquea pintampishiventerojate. ⁷Teetarite irooquee intigarankuimenteriji Aapani Irioshi Ishire antsarojiaquequea, iroguenti itigarankuimenteriquea iragavejacaamajacaji, aisa cameetsanjite ampintsamajajiaquemparinijite maasano caquinteguetatsica, aisa antsajiaqueniji anquenquejamaque anchoocatimenqueniji cameetsa.

⁸Imaica noncanquempiquea aatoquea pipashiventatsi pintsavetantavaequerigueti Amajirote. Aisa naatimpa aatoquea pipashiventacaanatsi pamenaquenagueti isantanatacotimentajiquenaro notsavetantavaequerigueti. Manaquea pinquejetaquenaja pantsipeventaquemparo Quenquetsatsarensimajaca Oganejencatatsica, iriotaque tampishitacaajiaquempineca Aapani Irioshi. ⁹Iriatimpa imeshiajiacaji, aisa icajemantacajica asavicaventajiaqueroniji inintaguetica, ancomajamajiaquempa. Teequea irooquee incajemacotantaji agameetsareni, inchiqiuojitaquea iriatimpa inintacaajiacaji. Icocani icavintsajajiacaji paesatoniqui tequera-tagueti onchoocatimateji, icantacoguitani coramani inintaguitini Aapani Irioshi incavintsajajiacaji Quirishito Jesoshi, ¹⁰cotanquitsiquea imaica yonigaajiacajiro iconijataquegueti Meshiantatsica Quirishito Jesoshi icoraquequitigueti, yanaavaetaquitiro-quea metojanentsi, ariquea itigarancacajiro Quenquetsatsarensi Oganejencata-

tsica, irooquee atsatantacaroca anijagantsimajaca, oguiconijatacajiro-quea quero ancojiajempani ancoguitempaniniji anijaguiteni. ¹¹Irooquee inintacaquenaca Aapani Irioshi nontsavetantavaeque, ipecaaque-quea itigarancane aisa tsatacaantantsica nontsatacaqueriniji teeca irijorijoigueji. ¹²Irootaquequea natsipevaetantacaca, cotanquitsiquea teequea nompashiventacaguemparoji isantanatacotimenquenaroguete notsavetantavaequeroguete, notsaquetarite queri navencaca. Aisa notsamajaquequea aatoquea yamatavijanatsi, yagavejama-jati inquempoguijamajataquenaro nojoquitajanarica, arimpaquea incavintsajacomajatanaquea arejevaetapojempa incoraquetajateguete.

¹³Ariqueate imaica pintsatacaantavaequeroguete pintampaticamajatanaque-quea Quenquetsatsarensimajaca notsatacaquem-pica, aatoquea picantashitatigarotsija. Pinquemisantamajata-naquerija Quirishito Jesoshi, aisa pimpintsamajataquemparijate papitsar-ventarijiate. ¹⁴Pintsavetantavaeque-quea Iguenquetsatsare Aapani Irioshi yojocajitaquem-pica, pintampaticamajateroja pincanquero, iriguentequea agavejacaquem-pine Ishire Aapani Irioshi choocashirentajiacajica.

¹⁵Pitsaquequea maasano guintenijia-tsica Ashiaqui yovashiantajianajana, iquejejiaca Pijero aisa Eremonene. ¹⁶Namanacoventajiaqueriquea ijitanepae Oneshiporo impintsatacojia-quempari Amajirote. Iriatimpa icavintsajapiniquena ishinetacajatana, teequea impashiventacaguenaji isantanatacojitaquenaguete. ¹⁷Quempe-taca yarejetapojacaguete ocانىqui Iromaqui icoapojana yamenaguevetapojana, itsitacavaepojajiro, ariquea yamenapojajana. ¹⁸Namanacovenqueri

incavintsajamajaqueriquea Amajirote incoraquetajategueti oncoramanitapoja-jegueti. Aviatimpa pitsaquetarite yamitacovaequenaquea nochoocaquiti-gueti Epesoquiniqui.

**Pinquempetaquemparija igoaretate
Jesoquirishito**

2 ¹Imaica, irijani, arimpaquea pintampishitashimajatanaque-roquea maasanopae inintaguetica Aapani Irioshi, iriguenti tampishitacaquem-pine Quirishito Jesoshi. ²Oraqueate maasanopae piquemaquenaca notsata-caantavaequegueti icapicopapinijiaca-gueti tsaromentajiacarica, imaica aviguentiquea tsatacaajiajerineca itsipapae papitsaromentarijiate comaja-majajianquitsica agavejajianquitsineca intsatacaajiaqueriquea itsipapae. ³Aisa pinquempetaquenaja naatimpa pantsipetacovaequemparoquea maasanopae, pisavicaventamajaquero-jate maasanopae inintaguetica Amajirote Jesoquirishito, pinquempeta-quempariquea coareta isavicaventiro-gueti maasanopae inintaguetica imajirote. ⁴Iiraquea coareta teequea inquenquejeroji inintaqueca iriatimpa, iroguentiquea isavicaventavaequequea taaca opaji icanquerica imajirote cameetsanijite irishinetacaquemparini-jite. ⁵Ariquea iquempetaca neshintsica-tavacagatsica iramenajitaqueriniji queri tampishimajatanquitsica, aatogueti inetsanatavaquero incantajiquerica, taampina iroguisotoitsijiquempari, aatoquea yojocajitiniri amatsaerontsi inintacajaivetacananarica iranaantaqueme-gueti. ⁶Ariquea iquempetaca aisa vintyaquitaroca oitsoqui, iriquetiquea aavajatsine. ⁷Pinquenquejacoterojate ocatica nocanquem-pica. Inchiquiojiquea iragavejacaquem-pi Amajirote pinque-mamajataqueronijite maasanopae.

Inquenquejamajaquerija Jesoquirishito

⁸Pincoquempanijate pinquenquejama-jaquerija Jesoquirishito ichoviquitana-queca Taavini, iriotaquequea pochata-najatsica imetovavetacagueti. Irootaque-quea Quenquetsatsarentsi Oganejencata-tsica notsavetantaqueca. ⁹Ariqueate natsipeventavaecaroquea, icavorejatsa-tacojiquna, iquempetacaavaequena-quea metojantatsica. Cotanquitsiquea oraqueate Iguenquetsatsare Aapani Irioshi aatoquea icavorejatsatocojitiro, arimpaquea ontsitacaguitejavaetana-quempa. ¹⁰Natsipetacovaeecaroquea taaca opajitapae, iriguentiquea natsipe-ventavaetaca maasano icoguiajiaqueca Aapani Irioshi, noninquequea iraventa-ventajitanaquempari Quirishito Jesoshi irimeshijiaquerinijite, iroarointaque-quea ichoocatigueti Aapani Irioshi incoguitempani inchoocaguiteni.

¹¹Iroomajaca ocatica icantajitica:

Imetojanaquegueti Quirishito
atsipajianacari, anchoocatanta-
jiapojajempaca iriatimpaqui.

¹²Arigueti antsipevenquempari,
anquejemajironatquempari.
Managueti ancantajiaque: “Teetarite
nontsateriji”, ariqueate inquem-
petaquempa iriatimpa
incanque: “Teequea nontsate-
riji.”

¹³Arigueti avashiantajianajeri,
iriatimpa arimpaqueate
irinetsanamajatanaquequea
maasanopae icantaguequeca,
teetarite iragavejempaji irama-
taguempaji.

**Antamajaqueneri Aapani Irioshi
irishineventantacajica**

¹⁴Pinquenquejacaajiaquerijate
papitsaromentarijiate maasanopae
ocatica nocantaguequem-pica. Iramenaji-

aquempiquea Amajirote pintsatacaaque-
rigueti. Pincantajiaqueriquea inquema-
vacaaiaquempaja, aatoja queroca
icotavacaajiatsi. Oraqueate incotavaca-
jiaaquempagueti querocampate incojia-
queroni, yovashiantacaguiritsi
quemaquemaiquerica. ¹⁵Pantamajaque-
nerija Aapani Irioshi irishineventanta-
quempica aatonijite ochoocatitsi
querocampate oguipashiventajaquempine-
ca oncoramanitapojajegueti. Pintsata-
caantamajatanaquerojate Quenquetsa-
tsarentsimajaca, aatojate picantashitatie-
matarojate. ¹⁶Aatojate picantaguisheta,
aisa aatoja picantashiguetatsi intati.
Irraqueate quejequeroca arimpaquea
impeacaaguishevaetanaquemparo
covaeguisherentsi. ¹⁷Oraqueate
itsatacaantajiaqueca quempejiguiroca
imaica arimpaquea onsitacaguitejavae-
tanaquemparoquea, manaquea onquem-
petaquemparo ompatsajanaquegueti
ateshi. Jero yovashiantantajanajaro
itsariventajiavecarigueti Amajirote.
Aritarite iquempejianaqueroquea
Imeneo aisa Pireto. ¹⁸Iriatimpajia
iroguenti icantashitatiejanacaroquea
Quenquetsatsarentsimajaca, icantaji-
aque: “Jac avisanaque itancoretancorei-
tantajitaca.” Iquejejanaqueroqueti
imaica manaqueate yovashiantacaaga-
rantajiaqueri tsariventajiavetatsica.
¹⁹Cotanquitsiquea quempetaca tsoviro-
naqui ivinchajacojitirogueti oquishoma-
jatigueti, orticaquea tsovironaqui
ipeacaacaca Aapani Irioshi
quishovaeque,^a aritarite itioncacojique-
rogueti ocanque: “Irraquea Amajirote
itsamajati querica yashintamajatacaca.”
Aisa ocanque: “Maasano aventacaroca
ivajiro Amajirote, iintsijate irovashian-

taguetanaqueroja maasanopae covaegui-
sherentsi.”

²⁰Oraqueate tsovironaquiqui caratsan-
tsanaquivaetanquitsica ochoocagueta-
quequea ipijatantajiguetaroca taaca
opajitapae. Oconoagarantacaquea
ipeacaantajiguetaroca cavorejatatsica
icantajitica ooro, otsipa icantajitica
perata. Ochoocagarantsitaquea
ipeacaantajiguetaroca inchatomenta,
otsipapae ivinchajantajiguetaroca
quepatsi. Oconoagarantaca ishineventa-
majatacaro irapinitero, otsipapae
manaquea itariantajicaro cajarashitequi.
²¹Quericagueti shetacaantaqueroneca
igovaeguishereshere pishoncamajatanajero-
neca covaeguisherentsi, inquempetana-
jemparoquea ipijatantajitaca ishineven-
caca ashincaro. Irishineventsitempari-
quea Ashincarica iragavejaque
intigaranquitsitempari irinetsanague-
queneri taaca opajitapae cameetsaripae
inintaguequeca.

²²Pintomicaguenquejanetapitsapana-
janteroja inintaguishetaqueca iriaque-
raca quenquevarijianaquitsica.
Arimpaquea pincomajamajatanaque-
mpaja, pintsariventamajatanaquemparija
Jesoquirishito, pimpintsatantempaja,
aisa pinconoajiaquemparija comajashi-
rentajitsica amanajiguirica Amajirote,
paavacaajiaquempa cameetsa. ²³Aatoja
piquemisantajiguiritsija quenquejamam-
peajiatsica cantamampeajigaroca intati
taaca opajitapae, pitsaquequea maasano
quempejiacarica iriatimpajia manaquea
icatsimatavacaajiaca. ²⁴Maasanopae
antajiguinirica Amajirote aatoquea
icatsimatantajitsi, manaquea impintsaji-
anaquempari maasano, intsajiaque
intsatacaantajiaque, aisa irantsipetaco-

a 2.19 Maasano tsariventajiacarica Jesoquirishito aquempejiacaro *tsovironaqui ipeacaacaca Aapani Irioshi*. Jesoshi iriguenti quempecaroca quishotacaquero. (Pamenero 1 Co. 3.9-11.) Maasano aventaventaquemparineca aato igea.

vaequempaqua. ²⁵Netsanajate incantomajajiaquerija teeca irinintajigueji inquemisantamajajiaqueroquea Quenquetsatsarensimajaca, aatoja icatsimajiguiritsi. Aricajate inchagashirentajiaqueriquea Aapani Irioshi, ariquea incantashitatijaianajempaqua irovashiantajianajero ipeacaaguishejia-vecaca, inquemisantajianaje, ²⁶iroompaquea intsajianaje inquenquejajianaqueroquea cameetsaripae aatonijite yagavejajiguiritsi ampatsini ashintajiavecarica aisa omperajiavecarica.

**Quero incojianaquempani
caquinteguetatsica
oncoramanitapojagueti**

3 ¹Noninque pintaque oca: oncoramanitapojagueti pajinigueti aapojempa savincaguiteri vegaratapajaatsineca, omanavaequempa. ²Iriaquea caquinteguetatsica irisati quenquejacotajatsine, aisa iriguenti inquenquejacojianaquaquea imentaquipae, iraventacovaequempa, irisemejiaque, incantaguishejiaqueriquea Aapani Irioshi, aatoquea iquemisantajiguiritsi iriri aisa iriniro, aatoquea iquenquejajiajiritsi pintsatacojiacarica, aisa aatoquea iquemisantajiajiritsi Aapani Irioshi. ³Aatoquea ipintsatacotantajiga, aatoquea ipetsimarejajiajatsi, incantaguishtacotantajiaque intati, aatoquea yagavejitsi itampishitashijiguirotsi covaequisherentsipae, irantsipetacaantavaejiaquempa, aisa aatoquea ishineventajigarotsi maasanopae cameetsaripae. ⁴Iriatimpajia irampigarancashitantaquempa, aisa irantashitanguetaquempa, caaviji iraventacoquempaqua. Aatoquea inintajiguitsi irishineventajiaquempariquea Aapani Irioshi, manaqueate irinintajiaquequea taaca opaji ishineventacaca iriatimpajia. ⁵Aisa intsariventamampeajiaquempari Aapani

Irioshi, cotanquitsiquea aato itsaroacagaritsi, iroguenti iramenajiaqueriquea tee irioshimajateji. Aatojate piconoajigaritsija quempejiaqueroa imaica.

⁶Iconoagarantajiaaqueate yoayoaitanaquequea otsovironaqueitequi manquigarentsijia teeca ontampishitashijigueroji ogovaequishere yamatavijijiaqueroquea, ocantacoguitaniqua oshineventamajatavacari quericaca tsavetantajiaqueroa otsipapae quenquetsarensi, oquemisantamajatavaqueroquea.

⁷Iroatimpajia ocantajiaveca onintajiaque ontsamajajiaquero Quenquetsatsarensimajaca, cotanquitsiquea teequea agavejajigueti ontsatimajigueroji, ocancani oquemisantamajatanaqueroquea amatavitantajiaatsica. ⁸Iriatimpajia iticaacovetavacaro Quenquetsatsarensimajaca, manaquea iquempejiacari Janeshini aisa Jaampereshini ticaavetavacarica Moishishini coramani. Iquenquejaguishevaequegueti taaca opajitapae covaequisherentsipae, yovashiantajiajaro itsariventajiavecarigueti. ⁹Cotanquitsiquea aatoquea icojigani iquemisantajitajiritsi, maasanotari iramenajianaquero teequea intsatimateji, manaquea inquempejiaquempari irirajia ticaavetavacarica Moishishini coramani teequea inquemisantajitajeriji.

**Paavoro icantanajiri Timoteo
incoquempanijate
intsavetantavaequeriquea Jesoquirishito**

¹⁰Imaica, irijani, notsaque pitsamajatavaqueroquea notsatacaguequempica, ariqueate piquejetanacaquea aviatimpa piquempemajatanacuenaquea naatimpa. Pitsaquequea teequea nompeacaguempaji covaequisherentsi, manaqueate nosavicaventamajaqueroquea notsavetantavaequeroquea Quenquetsatsarensimajaca, aisa notsariventamajacari-

queate Jesoquirishito. Teequea noncatsi-majigueriji teeca irinintajigueji inquemisantajigueroji Iguenquetsatsare Aapani Irioshi, manaqueate natsipetacovaeca, aisa nocavintsajiaqueriquea maasano caquinteja, nocoguitani.

¹¹Aisa pitsaque yatsipetacaavaequena-queate ontaniqui Antioquiaqui, Iconioqui aisa Irishitiraiqui. Caavijiquea icatsimacatsimavaequena, cotanquitsiquea ipintsatocotajanaqueate Amajirote yoguipaquiocotajana. ¹²Ariqueate inquempejiaquempaqua maasano nintajianquitsica intsariventamajajia-quepari Quirishito Jesoshi, irantsipeventavaetanaqueriquea. ¹³Cotanquitsiquea iriraquea peacaaguishevaecaroca taaca opajitapae coguisherentsipae, aisa irirajia amataajiatsica, caaviji irogaajianaquempaqua iramatavimatavitantanaque, aisa iramatavijitajitempari iriatimpa. ¹⁴Cotanquitsiquea aviatimpa pincoquempanija pinquemisantamajata-querojate itsatacaajitaquempica, pitsaquetari iroguenti iroomajaca, aisa pitsaquequea queri tsatacaaquempiroca. ¹⁵Chaaajaniquitirajampigueti pitsatsimajacaroquea Iguenquetsatsare Aapani Irioshi. Irootaquequea tsatacaanaquem-pineca pintsatantamajatanauempaca, aisa paventantamajatanauemparica Quirishito Jesoshi poimentanaqueniji ichoocatigueti pincoguitempani pinchoocaguiteni. ¹⁶Iriguentiquea tioncacaantaqueroquea Aapani Irioshi maasanopae Iguenquetsatsare. Irootaquequea tsatacaajiacajica, ocantomajajiacaji, otampaticatacanacaji, otsatacaanacajiro quero ancojiaquempani ancomajamajajianaquempanijite. ¹⁷Irootaquequea oquempetantacaca imaica cameetsanijite intsamajaqueni-jite yashintajiacaca Aapani Irioshi, iragavejajiaqueniji irinetsanaquero maasano cameetsaguetatsica.

Paavoro itampishitacaaqueriquea Timoteo

4 ¹Oncoramanitapojajegueti incoraquetajategueti Jesoquirishito impeapojempaueate imajirojiate maasano choocatajatsica anijajiatsica aisa metojajianquitsica, incantajiajojajeri quericaca peacaatsica cameetsari, aisa quericaca peacaatsica coguisherentsipae. Iriatimpa yamenajiacaji imaica. Ariqueate iquempetaca Aapani Irioshi yamenajiacaji iriatimpa. ²Irootaquequea noncantantaquempica pintsavetantavae-queriquea Jesoquirishito pincantajia-queriquea maasano quero icotani Aapani Irioshi imeshiantigueti. Pintsavetantapiniteroja arigueti irinintajiaque, aisa aatogueti inintajiguetsi. Pincantomajantaquequea, pintampishitacaantaquequea. Netsanaja pintsatacaantaquequea, inchiquiojita pisemashirentaritsi. ³Aapojaquempatarite savinca-guiteri aatonicate inintajiguetsi inquemisantajiajeri tsavetantajiguiroca Quenquetsatsarentsimajaca, iriguentiquea irinintajiaquequea itsipa tsatacaajia-querineca taaca opajitapae inintajia-queca iriatimpajia irishineventajiana-quempaca. ⁴Aatonica iquemisantajiajirotsi iroomajatatsica, manaquea impitsocashijianajemparo iquenquejashijiacaca caquinteja. ⁵Cotanquitsiquea aviatimpa arimpaquea pincomajamajata-quempaquea, pinquenquejamajata-quaquerojate cameetsaripae. Pantsipe-vaetanaqueroquea maasanopae, pisavicaventavaetanaquero pintsavetan-tavaetanaqueroquea Quenquetsatsa-rentsi Oganejencatatsica. Pintampaticamajatanaueroquea maasanopae inintacaquempica Amajirote.

⁶Imaica noquejetacaro imirajitaca ishaguetsijitantacarica viratsi itaajique-nerigueti Aapani Irioshi, natsipeventaca-

ritari. Irooshipoji noantanaquempaca iriatimpaqui. ⁷Noquejetacariquea ashimirintamajatatsica, aisa noquejetsitariquea shiamajatatsica narejetsipojajaro ocaratapojaquegueti, nonetsanama-jaquerotari maasanopae icanquenaca Amajirote, teequea novashiantimateroji notsarovenarigueti. ⁸Iriatimpa iriguenti Majirontamajatatsica Joesemajaca tampaticamajatiroca maasanopae, incanquequea quero inchoincoitaquerini maasano caquinte. Yamaquenana notsaroventamajatacari, irootaquequea imaica yoguijacaquenaaroquea amatsaerontsi^b iramatsaetantaquenaaroquea oncoramanitapojajegueti, cotanquitsiquea aatoquea aparato naatimpa yamatsaetitsi, inquejetsijiguempariquea aisa maasano oguijamajatavajirica incoraquetajategueti.

Icaratacaaguetanajiniri

⁹Pinetsanatsitemparoja pincoraquepo-
jajejate taampina pinejaatenaja,
¹⁰iroorijite itsinampirejanaquenaquea
Temashi yoanaque Tesaronicaqui,
caavijiquea anaaque ishineventavaeta-
nacaroquea quepatsipaequitica.
Irraquea Quereeseente yoanaquequea
Garashiaqui. Irraqueate Tito yoanaque-
quea Tarimashiaqui. ¹¹Apatiroti notsipat-
tajari Irocashi. Arigueti pincoraqueque-
gueti paajaterita Maricoshi pintsipata-
jempari, nonintaquetarite iramitacovae-
tapojajena nantavaetaquenerigueti
Amajirote. ¹²Irraquea Tiiquico
notigarancaqueri Epesoqui. ¹³Pincora-
quequegueti pamajenaroja nogataaom-
renare nojoquijitanaquea Toroashiqui
itsovironaquitequi Caripo. Aisa pamaje-

naraja novaperitepae, irootarite
nonintamajataqueca nomeshinatsitepae
notioncantaguetacaca.

¹⁴Irraquea Arijantero peacaagueta-
roca taaca opajitapae cavorejaguetatsica
icatsimatacaantaquena. Inchiqiojita-
quea inquejequeri Amajirote. ¹⁵Shoo-
shoh icatsimatacaantimpitsijate
aviatimpa aisa, iticaaquerenari notsave-
tantaquerigueti Jesoquirishito.

¹⁶Iroaquegueti yaajitanaquenaqueti
jivatatsicaqui teetarite inchoocateji
aparo amitacotanaquenaneca, maasano-
quea itsinampirejajianaquenaquea,
aparoquea noquenquetsaventanaca
naatimpa. Cotanquitsiquea teequea
noninteji inquenquejacaajiaqueriquea
Aapani Irioshi oncoramanitapojajegueti.
¹⁷Cotanquitsiquea iriraquea Amajirote
yamitacovaequenaquea itampishitaca-
naquena, nagavejantacaca notsavetanta-
vaequeriquea Jesoquirishito cameetsani-
jite inquemajiaquenijite maasano teeca
irijorijoigeeji. Aisa yaajitavajana
yatancavequenaqueti casecari.^c ¹⁸Arim-
paeate impintsatacomajatanaquena
Amajirote querocaca incojivequenani,
iroompa iranaquenaqueate jenoqui
inquitequi imajirontacagueti. Jaameja
ancoguitempani ashineventajiaquem-
pari, incantajiaqueri: “Caaviji pogane-
jencamajata!” Ari oncoquempa.

¹⁹Pincamanqueroja Pirishica nococani
noquenquejajiro, aisa Aquira noquenqueja-
queriquea, aisa ijitaneja Oneshiporo
pincamanquerijate noquenquejiaqueriquea.
²⁰Irraquea Erashito ichooaque Corintoqui.
Irraquea Toropimo nojocanaqueri Miretoqui
yojoquijitaca. ²¹Aviatimpa, irijani,
pincoraquepojjaja taampina tequeratagueti

b 4.8 *amatsaerontsi*. Manaquea iquempetacaacaro coramani ishiashivijitagueti iramenajiaqueri quericaca anaantanquitsineca, iriraquea majirontatsica iraitsitempariquea iramatsaetsitempari. **c 4.17** Icanquegueti *yaajitavajana yatancavequenaqueti casecari* arica mana iquejetacaajiacanari intati, quejetaca incante: “ipintsatcovaeataquena teeca irojocantajitenaji irimetojajiquenanijite, quejetacashia yatancavequenaqueti casecari”.

oncatsincaguiteteji. Irirajia Eovoro, Porente,
Irino, jero Caraoria, aisa maasano apitsaro-
ventarijiate inintajiaquequea pinquemacojia-
queri choocajia iquenquejajiaquempiquea.

²²Noninque intsipamajaquempiquea
Amajirote Jesoquirishito pishirequi,
incavintsajamajajiaquempiquea aviatimpajia
maasano.